

- केन्द्र सरकार इंडिया सेमी कंडक्टर मिशन रा तैत एक और कारखाना री मंजूरी दीनी— 3 हजार 706 करोड़ रुपया रो खर्च आवेला।
- जस्टिस बी.आर. गवई सुप्रीम कोर्ट रा 52वां मुख्य न्यायाधीश रा तौर ऊं शपथ लीनी।
- उपराष्ट्रपति जगदीप धनखड़ रो काल जयपुर दौरा रो कार्यक्रम-भैरोंसिंह शेखावत स्मारक पुस्तकालय रो उद्घाटन करेला।
- प्रदेश मांय काल ऊं घणखर ठोड़ां पारो चढ़बा रा आसार-जोधपुर अर बीकानेर संभाग मांय जोरदार गर्मी री संभावना।

000

प्रधानमंत्री नरेन्द्र मोदी री सदरत मांय आज व्ही कैबिनेट री मीटिंग मांय केई खास प्रस्ताव मंजूर करी ज्या। केन्द्रीय मंत्री अश्विनी वैष्णव कैबिनेट री मीटिंग मांय करी ज्या फैसलां री जाणकारी खबरनवीसां ने देता थकां बतायो के केन्द्र सरकार देश रो छठो सेमी कंडक्टर कारखानो लगावण री मंजूरी दे दीनी है। उत्तरप्रदेश मांय लगाया जावण वाळा ई कारखानां माथे करीब 3 हजार 706 करोड़ रुपया खर्च व्हेला। श्री वैष्णव बतायो के सेमी कंडक्टर बणावण रा पांच और कारखाना रो काम चाल रह्यो है।

000

न्यायमूर्ति भूषण रामकृष्ण गवई आज देश रा 52वां मुख्य न्यायाधीश रा तौर ऊं शपथ ग्रहण लीनी। राष्ट्रपति द्रौपदी मुर्मू राष्ट्रपति भवन मांय राख्यी ज्या कार्यक्रम मांय न्यायमूर्ति गवई ने ओहदा री शपथ दिरायी।

जळसा मांय उपराष्ट्रपति जगदीप धनखड़, प्रधानमंत्री नरेन्द्र मोदी, कई केंद्रीय मंत्री अर सुप्रीम कोर्ट रा जजां समेत केई मान्योड़ा लोग माजूद रह्या। जस्टिस गवई न्यायमूर्ति संजीव खन्ना री ठौड़ लीनी, जो काल रिटायर व्हे गया हा।

000

आतंकवाद रे खिलाफ चलायी ज्या ऑपरेशन सिंदूर री कामयाबी परां भारतीय जनता पार्टी री ओर ऊं पूरा देश मांय राष्ट्र गौरव तिरंगा यात्रा निकाळी जा रही है। 23 मई ताई चालण वाळी ई यात्रा रे जरिये भारत री फौज री हिम्मत अर वीरता ने नमन कर्यो जा रह्यो है। ई सिलसिला मांय जोधपुर समेत केई रेलवे टेसनां ने तिरंगी रोशनी ऊं सजायी ज्या है अर देशभक्ति रा गीत बजाया जा रह्या है। यात्रा रे जरिये जनता रा दिल-दिमाग मांय देशभक्ति अर राष्ट्रीयता रो जज़्बो जगायो जावेला। ई बीचे उपमुख्यमंत्री डॉ. प्रेमचंद बैरवा कह्यो है के पहलगाम आतंकी हमला पाछे चलायी ज्या ऑपरेशन सिंदूर रा इतिहास ने आवता बगत मांय बच्चां ने पढायो जावेला। वे आज कोटा मांय खबरनवीसां सागे बातचीत कर रह्या हा। वे कह्यो के पहलगाम आतंकी हमला री जवाबी कार्यवाही रा तौर ऊं चलायी ज्या ऑपरेशन सिंदूर रा तैत भारत, पाकिस्तान मांय केई आतंकी ठिकाणा नेस्तनाबूद कर दीना। वे कह्यो के फौज री निष्ठा, देशभक्ति अर रण कौशल माथे देश रा हर रेहवासी ने नाज है।

दूजी कानी भाजपा रा प्रदेश अध्यक्ष मदन राठौड़ आज जैसलमेर रा उगरास गांव रो दौरा कर र भारत-पाक तनाव रे दौरान पटकी ज्यी मिसाइल री ठोड ई देखी। श्री राठौड़ मुश्किल हालात मांय बीएसएफ रा काम री सराहवणा कीनी। कैबिनेट मंत्री हीरालाल नागर ई आज कोटा जिला रा सांगोद मांय निकाळी ज्यी राष्ट्र गौरव तिरंगा यात्रा मांय शिरकत कीनी। देश री हिफाजत मांय लाग्योड़ा फौजियां रा मान मांय काल जयपुर मांय तिरंगा यात्रा निकाळी जावेला। प्रधानमंत्री नरेन्द्र मोदी ई लारला दिनां देश रा नाम दिया ज्या संबोधन मांय आतंकवाद ने बिल्कुल बर्दाश्त नी करण री नीति माथे जोर दीनो हो।

000

उपराष्ट्रपति जगदीप धनखड़ रो काल जयपुर दौरा रो कार्यक्रम है। वे पैली वाळा उपराष्ट्रपति अर प्रदेश रा तीन दफा मुख्यमंत्री रहया भैरों सिंह शेखावत री पुण्यतिथि रे मौके वां री याद मांय बणायी ज्या पुस्तकालय रो उद्घाटन करेला। विद्याधर नगर स्टेडियम मांय राख्या जावण वाळा ई कार्यक्रम मांय मुख्यमंत्री भजनलाल शर्मा, केंद्रीय मंत्री गजेंद्र सिंह शेखावत अर लोकसभा अध्यक्ष ओम बिरला समेत केई मान्योड़ा लोग शिरकत करेला। पैली वाळा उपराष्ट्रपति भैरों सिंह शेखावत अगस्त 2002 ऊं जुलाई 2007 ताई भारत रा 11वां उपराष्ट्रपति अर राज्यसभा रा पदेन सभापति रहया।

वे साल 1952 मांय राजस्थान विधानसभा रा सदस्य रा तौर ऊं सियासी जिन्दगी री सुरुआत कीनी ही।

000

रीको री प्रत्यक्ष भूखंड आवंटन योजना रा दूजा दौर सारू काल ऊं ऑनलाइन तरीका ऊं अर्जी दी जा सकेला। रीको री प्रबंध निदेशक शिवांगी स्वर्णकार बतायो के ई रा तैत राइजिंग राजस्थान ग्लोबल इन्वेस्टमेंट समिट मांय 30 अप्रैल ताई करार करण वाळा निवेशकां ने चिन्हित औद्योगिक हलकां मांय आरक्षित मूल्य माथे प्लॉट दिया जावेला। योजना रा तैत 98 औद्योगिक हलकां मांय 7 हजार एक सौ प्लॉट काट्या जावेला। प्रत्यक्ष भूखंड आवंटन योजना मांय महिला वर्ग, अनुसूचित जाति अर जनजाति अर पैली वाळा फौजियां सारू प्लॉट आरक्षित करी ज्या है। प्लॉट आवंटन री ई-लॉटरी 5 जून ने निकाळबा रो कार्यक्रम है।

000

प्रदेश मांय नौजवानां मांय मानसिक स्वास्थ्य रा बारा मांय जाग जगायी जावेला। ई सागे ई वां ने तनाव ऊं दूर रेहवण अर न्यारा-न्यारा मुद्दां माथे जरूरी मार्गदर्शन दियो जावेला। ई सारू 17 मई ऊं ऑनलाइन तरीका ऊं सिखावण दी जावेला।

000

प्रदेश मांय हरियाळो राजस्थान अभियान रा तैत रोप्या जावण वाळां पौधां रा बारा मांय आज कृषि अर उद्यानिकी विभाग री मीटिंग राखी ज्यी। विभाग रा शासन सचिव राजन विशाल बतायो के मीटिंग मांय मिशन कर्मयोगी पोर्टल अर ई-फाइलिंग समेत न्यारा-न्यारा मुद्दां माथे विचार करी ज्यो। वे अहलकारां ऊं बजट मांय करी ज्या ऐलाण ऊं जुड्या काम तय मियाद मांय पूरा करण सारू कह्यो। मीटिंग मांय फार्म पौण्ड, डिग्गी, पाणत सारू पाईप लेण, खेती-बाड़ी ऊं जुड्या सामान अर तारबंदी समेत न्यारी-न्यारी योजनावां रा बारा मांय विचार करी ज्यो अर जरूरी दिशा-निर्देश दिया ज्या।

000

प्रदेश मांय घणखर ठोडां काल ऊं पारो 2 ऊं 3 डिग्री सेल्सियस ताई चढ़बा रा आसार है। मौसम विभाग काल ऊं जोधपुर अर बीकानेर संभाग मांय अधिकतम तापमान 44 ऊं 45 डिग्री सेल्सियस बीचे दर्ज व्हेवण रा आसार जताया है। ई बीचे आज ई केई ठोडां आंधी चाली अर बिरखा व्ही। म्हाणी हनुमानगढ़ खबरनवीस बतायो के जिला मांय केई ठोडां बिरखा सागे ओळा ई पड़्या।

000

हनुमानगढ़ मांय बिरखा व्हेवण सागे ओळा ई पड़्या। श्रीगंगानगर जिला रा सूरतगढ़ अर पदमपुर मांय जोरदार बिरखा व्हेवण अर कठे-कठे ओळा पड़बा रा समाचार है। जिला रा अनूपगढ़ अर घड़साना मांय ई जोरदार मेह बरस्यो। बांसवाड़ा मांय दोपहरां पाछे रिमझिम बिरखा व्ही। उदयपुर मांय तेज बायरो बाजण सागे व्ही झमाझम बिरखा ऊं केई हलकां मांय पाणी भर ग्यो। दूजी कानी चूरु अर भीलवाड़ा समेत केई ठोडां आखा दिन जोरदार गर्मी अर उमस रही।

000

बूथ लेवल रा अहलकारां –बीएलओ ने बेगा ई मानक पहचान पत्र जारी कर्या जावेला। मुख्य निर्वाचन आयुक्त ज्ञानेश कुमार आ जाणकारी दीनी। वे आज नई दिल्ली मांय हरियाणा, दिल्ली अर बिहार रा बूथ लेवल अहलकारां, निरीक्षकां अर मतदाता पंजीकरण अधिकारियां रा दो दिन रा क्षमता निर्माण प्रशिक्षण कार्यक्रम रा उद्घाटन पाछे आ जाणकारी दीनी।

वे कह्यो के आ सिखावण लेवण वाळा आप-आप रा राज्य अर केंद्र रा राज वाळा प्रदेशां मांय दूजा बूथ लेवल अहलकारां ने ई सिखावण दे सकेला। सिखावण कार्यक्रम मांय जमीनी स्तर रा तीन सौ 71 चुनाव कर्मचारी सिरकत कर रह्या है।

000

राजस्थान लोक सेवा आयोग री ओर ऊं 17 मई ने जनसम्पर्क अधिकारी परीक्षा-2024 करायी जावेला। परीक्षा संवारे 11 बज्यां ऊं दोपहरां पाछे डोढ़ बज्यां ताई ली जावेला। ई सारु जयपुर मांय 75 सेन्टर बणायी ज्या है। परीक्षा सारु 19 हजार 318 उम्मीदवार अर्जियां दीनी है। परीक्षा सारु जिला कलेक्टर रा दफतर मांय कन्ट्रोल रुम बणायी ज्यो है।

000